

Il cussegl federal vul sustegnair scolas bilinguas

Moziun da cussegliera naziunala Silva Semadeni (ps GR)

DA MARTIN CABALZAR

■ Il cussegl federal è pront da laschar elavurar ina strategia per promover scolas bilinguas en las linguas naziunales. Consequentamain è el pront d'acceptar la moziun da la cussegliera naziunala grischuna Silva Semadeni (ps) che è vegnida sustegnida da 91 signataris. La finamira è d'elavurar en cooperaziun cun ils chantuns ina strategia cun differentas mesiras subsidiaras per pudair realisar tant pli spert classas bilinguas en las linguas naziunales e quai ordaiifer lur territoris da tschep. La promoziun intensivada da classas bilinguas duai succeder cunzunt en citads e vischnancas nua che la populaziun demussa in interess documentà per la tgira e la promoziun d'ina lingua naziunala ordaiifer il territori tradiziunel. Sco exempel numna *Silva Semadeni* las partiziuns bilinguas rumantsch/tudestg e talian/tudestg che vegnan manadas cun success a Cuira. Ella pudess era s'imaginar partiziuns bilinguas talian/tudestg a Turitg etc.

«Scolas bilinguas èn in instrument efficient per promover la sensibilitad intercultura e la cohesiun naziunala», è Silva Semadeni persuadida. Ella è cunscenta che la promoziun da las scolas bilinguas è primarmain ina obligaziun dals chantuns. La confederaziun possia dentant stimular ils chantuns da realisar da cuminanza projects da pilot.

La moziunara è fitg satisfatga che er il cussegl federal cundivida questa finamira ed è pront d'elavurar ensemen cun ils chantuns strategies e mesiras necessarias.

Fatg bunas experienzas cun classas bilinguas

Silva Semadeni è persuadida che in'instrucziun immersiva che tanscha da la



Cussegliera naziunala Silva Semadeni è ordvart satisfatga che il cussegl federal è pront d'acceptar sia moziun. KEYSTONE

scolina fin al stgalim secundar II facilite-schia d'emprender a moda efficienta las linguas naziunales, cunzunt era las linguas pitschnas talian e rumantsch. «L'immersiun è ina metoda efficienta che porta avantatgs cumprovads sin l'entir mund, accentuescha Silva Semadeni. En Canada, in pajais biling, han frequentà 2012 betg main che 15 pertschient, u 330 000 scolars, las scolas bilinguas. En quest regard haja la Svizra quadrilingua anc in grond potenzial da svilup, manaja Silva Semadeni en l'argumentaziun da sia moziun.

Fitg bunas competenzas er en la segunda lingua naziunala

Ultra dals chantuns Vallais e Friburg e la citad da Biel/Bienne gioghia cunzunt il chantun Grischun ina rolla activa en quest regard. Sco mesira efficienta per promover il talian u il rumantsch exista oz la pussaivladad da

manar ina scola entira u era mo singulas classas a moda bilingua. Ina mesadad dals roms vegn instruida en tudestg, l'autra mesadad en talian u rumantsch. Dapi passa 10 onns mainia la citad da Cuira classas bilinguas (tudestg/rumantsch e tudestg/talian).

La purschida volontaria che vegn offerida da la scolina fin la maturitad vegnia nizzegiada frequentamain. Scolaras e scolars emprendian dal cumenzament enna d'applitgar duas linguas naziunales sco instrument da comunicaziun e da patratgar. Uschia cuntanschan ils scolars ina buna cumpetenza linguistica er en ina segunda lingua naziunala.

Tenor Silva Semadeni che instruescha er a la Scola auta da pedagogia a Cuira han uffants che creschan si a moda bilingua in meglier sensori per las differenzas culturalas e per las atgnadads en noss mund globalisà. Quai saja per differentas professiuns in grond avantatg.

Plinavant è Silva Semadeni persuadida che l'instrucziun immersiva en duas linguas intermediateschia er elements cultural che promovian ina meglra chapientscha vicendaivla e servian uschia er a la cohesiun naziunala.

Betg enoms custs supplementars

Silva Semadeni cumbatta la critica che questa moziun effectueschia in augment considerabel dals custs. Presupponi che l'interess necessari saja avant maun vegnian las classas bilinguas manadas a moda parallela tar l'instrucziun normala e lur frequentaziun restia volontaria.

Silva Semadeni è dentant era cunscenta che la promoziun durabla da classas bilinguas dovria ses temp. Uschia haja ella sco anteriura parlamentara communal da Cuira gi inoltrà 1996 in postulat per realisar a Cuira ina scola bilingua. Fin la realisaziun dal postulat sajan la finala spirads quatter onns.